


Die Flomerschummer Arweitsgemeinschaft bräsendiert:



Goldene Konfirmation in de Stephanus-Kerch
in Flomerschumm am 23. Mai 2004
e Noochlees vunn de Christ Müller

Mer kanns net glaawe awwer wohr, de Parre Walter hot uns konfermiert vor 50 Jahr. Ach Gott wu is die Zeit hie kumme, so hert mer manchen froochend brumme. Domols war`s e armi Zeit, mer hott kä so Fertz gemacht wie heit. G`feiert hot mer trotzdem schää. Die meischde hadden in Schdallhas, Hinkle oder e Seische gschlacht, do hot de ehne iwwer de anner iwwerhaupt net gelacht. Die Mode war schwarz. Bei e paar Määdle waren weiße Schbitzkrägelscher uffem Klääd un e Kränzel uffem Kopp, mehr sahen gut aus, mehr waren top. Die Buwe hatten e schwarz oder dunkelblaues Anziegel an, e weißes Hemd mitre Migg owwe droo. Die waren gescheidelt unn standen ganz schdeif, mer alle waren schunn fotoreif. Die Priefung die raubte uns de letschde Nerv. Die Lieder auserm G`sangbuch unn faschd de ganze Kateschismus mit unner, des lernten mer nuff unn ach widder runner. Die Kerch war feierlich unn besinnlich unn ach unvergesslich. Dehäm hot mer die G`schenke kassiert, was anneres hot garnimmi interresiert. Bald kam in Schub vun de Hormone, do brauchschd känn Jesus, s`geht auch ohne. Des Lewe nimmt ehm in Beschlag, unn dann kummt schunn de Hochzisdach. Voll bischt im Liewesfimmel und dorgelscht rum im 7. Himmel , unn do ganz ohne Spott, brauchschd nor korz de liewe Gott!

Doch im Alldach des iss wohr, kummt er selten oder garnimmi vor. Im Beruf bischd angagiert, Kinner werren programmiert. Ja des Lewe is e Hetz, hoscht selbscht Konfirmande jetzt. Jetzt schbielscht a mit der Idee, mol widder in die Kerch zu geh. Die Kinner fligg unn ziehen aus, leer iss widder s Elternhaus. Urplötzlich schreibt die Kerch, de Herr Pfarrer Rausch galant, sie sinn jetzt Goldener Konfirmand, unn werscht als solcher voller Gnade zur Feier herzlich ingelade. Wer des will unn Interesse zeigt, der ruft zurick oder schreibt.

Die Mehrheit kummt zum Jubelfescht, wie immer fehlt in kleene Rescht. Die kranke

Kamerade die hänn uns gedauert, denne annere hawwen mer nit nochgetrauert. Doch jeder därf , du isch nit erre, frei entscheide, seelisch werre. Vunn Ebbschdää waren`s 5 Konfirmande un 2 Menonite, wie immer iss Flomerschumm in de Iwwerzahl, na bitte! Unsere Mitschielere die Katholike duen uns mit nem große Geschenk begligge. Eine Sängerin mit herrlicher Stimme, dut unsere Konfirmandelieder vunn domols singe. Mit feischde Aache hot mer sisich zuriggerinnert. Die Jugend kummt der in de Sinn, vunn wo kummscht her unn wo gehscht hin. In stillem Gedenken schmückten wir die Gräber von unserem Pfarrer Walter und Geistlichem Rat Willenbacher.

Am Nachmittag waren mer widder all beisamme bei Kaffee unn Kuche, belegte Brote, bei Woi , Bier und Scholle. Mer hänn gebabbelt vunn frieher bis jetzt in die Zeit, des waren e paar scheene gemeinsame Stunne, des sagen mer heit. Bedanken möchten wir uns noch bei Pfarrer Rausch, für den festlich gestalteten Gottesdienst. Unseren katholischen Mitschülern aus Flomerschumm für das unvergessliche Geschenk, den Sologesang. Pia Bracht für das Dankgebet. Frau Marga Peter, Rosel Pollich, Elli Schäfer und Rosel Firmery für die Hilfe und Unterstützung zum Gelingen unseres Ehrentages.

Ich fer moi Dää, wünsch uns all konkret, dass ledschlich äner mit uns geht uff dem schwere Weg durch`s große Door , sunscht kummt mer sich so verlore vor.

Die Kaafuschd

Det isch alles des kaafe, was agebote werd, misst isch Dag un Nacht schaffe, awwer weil des nit geht, horsch isch äfach nit zu, gugg isch äfach nit hie. Awwer weil isch halt so, unn nit annerscht bin, schbitzel isch halt doch ab unn zu zum Ogebot hie.

Christl Müller

Dess gibts heid alles nimmi!

Friejer hot`s im Feld bei de Baure a was zu Esse gewwe. Weiße Käs, Ladweg, Lewwer- unn Grieweworscht, Kaffee, meischdens Malzkaffee mit viel Milsch. Irgendwann emol sinn die Latsche-Buwe ins Feld g` fahre. Weil`s dort noch kä so e Flurbereinischung gewwe hot, do war jedes Äggerle wu annerscht, so war`s a do. Wie de Immo owwe ans End vunn seim Agger kumme iss, steht do de alde Brennersvadder. Saggmesser in de äne Hand unn in de Anner e Schdigg Kraggauer. Do frogd de Immo: *“Na Brennersvadder wie geht`s eisch dann?”* - *“Jo isch hab`s e bissel im Maage unn in de Därm, do hab isch mer halt e greßeres Schdigg Kraggauer genumme, weil die Lisabeth g`saat hot, isch soll e mols`Brot weglosse”*.

Lore Latsch

Die Fine schillt iwwers Kaadeschbiele weil soo viel Zeit dodemid vergeht. De Hannes niggd: *“Dess schdimmd, hauptsäschlich beim Mischle!”*

Christl Müller

Demm Hahne-Goggel soi Tempo-Dreirad

vumm **Dr. Rodo Schmidbauer**

De alde Flomerschummer werd's noch gedenke: In de 40er unn 50er Johre hot's beim Hahne-Goggel (Kurt Hahn) noch Milsch, Budder, Eier unn Kees gewwe. Er, soi Fraa unn schbeeder soin Sohn hänn in de Schdrooß dess glääne Gschäftel bedriwwe. Gewohnt hänn'se in Ebbschdää - unn so iss jeden Owend nooch Gschäftsschluss de Hahne-Goggel mit seim schwachmoddorisierte Tempo-Dreirad vunn Flomerschemm nooch Ebbschdää getuggert.



Domools waren im Herbscht die Bahnschranke efdér zu als uff, weil die Giederziech mit denne viele Zuggerriewe ferr die Frankedahler Zuggerrawrik an ähm Schdigg hie- unn herrangschiert hänn. Unn so hot ah de Hahne-Goggel mit soim Tempo an de Schranke oft halde misse. Im Dunkle hänn meer 3-4 Kaffruuse dann versucht, dess Audole erscht fescht zu halde unn dann bletzlich los zu losse.

Ämool hämmer dann dess Tempole am Eisebahnschild feschtgebunne. Beim Losfahre hot's gekracht unn dess Chassi iss allä losgebrummt. Die ganze Uffbaute hänn uff de Schdrooß geleje.


Ach sinn meer do verschrogge - zum Glick war dann doch nit all zu viel kabutt gange.

Bosch

so - unn jetzt kummt enn Beidrag uhne Absender - meer wissen nit, ob die Schreiwerin absichtlisch nit genennt werre will odder ob se bloß vergesse hott, ehrn Name drunner zu schreiwé:

Die Gaulsworscht:

In moine junge Johre hot merr eifers mool moi Gall gezwigg. Wass hab isch gemacht? E Pillsche gschluggt, bis es widder besser war. Schöne Daags hot jemand zu mer gsaat, isch soll doch mool Gaulsfläsch unn Gaulsworscht esse. Dess hab isch ah gemacht. Isch kann eisch sage, dess war prima. Fläschworscht, Wärschtelscher unn die guude Schdeeks - 's iss halt bloß nit jedermann's Gschmack. Moin Mann hot vunn de Fläschworscht immer Worschtsalat gewollt. Schöne Dags hot uns moin Bruder mit soine Fraa besucht. Soine Fraa hab isch Worschtsalat agebote. "Nä - vumm Gaul ess isch nix!" Do hab isch gsaat: "Wäascht wass, do ess halt mit meer Wärschtscher". Dess hot se ah gemacht - bloß waren die jo ah vumm Gaul - awwer dess wäas se bis heit nit. --- *Anonymus*



Rädseluffleesung aus Nr. 13:

SCHLILHAUSDAESCHELTUERMSCHEBAUER

Die Gewinner:

1. Breis: - 6 Flasche Elwedritschwoi:


Günter Hoffmann - Flomerschumm

2. Breis: - 4 Flasche Elwedritschewoi:

Hans-Dieter Wagenhoff - Flomerschumm

3. Breis: 2 Flasche Elwedritschewoi:

Peter Kuhn - Flomerschumm



Dodezu basst so schäh enn Brief vunn de Kuni Selzer aus Basel:

Was hab isch misch mit eire Rätsel gschunne, isch hett doch ah mool gern soo'n Woi gewunne.

Awwer wie bin isch mit moim IQ dran, dass isch die Rätsel net lööse kann?

Bin isch so viel dümmer wie Dochter unn Sohn odder liegt's dran, dass isch iwwer 46 Jahr nimmi in Flomerschumm wohn?

Isch, wu immer geglaabt hab, isch kann noch moi pälzisch noch perfekt !

Jetzt erscht wees isch, wieviel Dummheit imme Mensch vonn meiner Gröss drinschdeckt.

Misch hott die Wut e paarmool gepaggt, sieer mool war isch korz vorm Herninfarkt - e paar mool ans Sterwe gedenkt - Hirn widder in grade Bahne gelenkt unn ämool hab isch korz geflucht unn dann halt die Leesung im negschde "Gebabbel" gsucht.

Denn unbedingt sterwe wollt isch ach net desswege, im Herrgott kääm dess ach nit gelege.

Deet isch nämlisch saage: "isch bin aus Flomersheim", käm isch net in de Himmel rein. Sag isch allerdings: "isch bin gebore im Flomerschumm", dann sescht e Schäff bestimmt mool: "aller dann kumm".

Herbschd

Die erschde gelwe Blädder glänzen in de Sunn. E Schbinnwebnetz hängd silwer drinn unn schaugelt fesched im Wind bis en Voggel kummt. Lang sinn die gelwe Blädder nid allä - braune unn rode werren noch gemohld. Schbinnwebnetz'l werd ganz schdeif, es hjot's erwischd de erschde Reif.

Wass der Herbschd mit dem Summer alles macht! Die Sunn schdeht jetzt schunn ganz schä schief, die Veggel sitzen uff de Drehd unn werren a ball weiderziehe.

Christl Müller

Die Kerwe als Erinnerungsfeschd

Akribisch rescherschert unn uffgschriwwe vunn de Ursel Lutz

Jetzt hämmer se grad rum, unser Flomerschummer Kerwe un so mancher Junge werd sich vielleicht iwwerlegge, wuher des Feschd "Kerwe" eigendlich kummt. Wammer so in de Bücher stöbert, dann kummt do allerhand zum Vorschoi.

"Kirmes, Kerwe, auch Kirchweih genannt, war ursprünglich ein Erinnerungsfest an den tatsächlichen Tag der Kirchweihe", so stehd do zu lese. Un genau an demm Dag is dann immer widder gfeiert worre. Im Lauf vun denne Johr sin die Kerchedage, also Kirchentage, uff Wunsch von de Landesherre all zusammegelegt worre und jetzt feire merr all im Umland so ziemlich all zwische Auguschd un Michaelis, dess is de 29. September. Frierer war die Kerwe e großes Dorf- un Familiefeschd un hot mindeschdens zwee Dag gedauert.

Vorher is dagelang gebacke, gekocht uns Haus gebutzt worre, damit beim Besuch vun de Familieogeherische und Froinde alles geblitzt un gegläntz hot. Un bei monche ältere Fraue in Flomerschum solls denn Kerwebutz a noch heit gewwe: Alles werd gschrubbt, die Matratze nausgeschleeft un gekloppt, die Vorhäng gewesche. 'S klingt uwahrscheinlich, 's is awwer wuhr! Ach ja, un neie Kleeder un neie Schuh hots a an Kerwe a gewwe un a e bissel Kerwegeld. Zu de Kerwe hot ganz frieher in de Derfer a noch de Kerchgang sunndags gheert un e Prozession durchs Dorf un iwwers Feld. Un de Kerweboom is uffgschdellt worre mit viel bunde Bänder dro. Dann hott merr defdisch gesse. Mehr gedenken Markkleeselsupp, Broodeflesch, Kneedel, Rotkraut un nochmittags hots allerhand Kuche gewwe: Quetsche- und Schmandkuche, Appel-, Krimmel-, Zimt-/Zuckerkuche un Schneckenudle. Un owens war Kerwedanz und der war in Flomerschum beliebt, vor allem bei denne, wu grad 18 worre sinn, weil se vorher jo nirgens hikedirft hän. Un uffem Dorfplatz, bei uns frieher uffem Falterplatz, hot e Kinnerreitschul, manchmol e Kettereitschul, en Schieß-, en Los- un en Gutselstand und Ende vun de 50er Johr a e Rauwebahn gstanne. Do is als so e Art Zeltdach während de Fahrt iwwer de Wägge zugange und die Jugend, wu - wie merr heit sagt -schun "Schmedderling im Bauch" ghat hot, hot ganz korz schmuse un kussle kenne.

Nochem Krieg is a in unserm Dorf alles was mit de Kerwe zu due ghat hot, e bissel oigschlofe. Es war jo a kä Geld unner de Leit.

In de 60er Johre, dess wees ich noch, hot de domolische Zwiwwelböck-Präsident Karl Wind die wahrscheinlich allererschd Kerweredd noch em Krieg verfasst und sich als Kerweborsch mit em Zylinder uffem Kopp vor de TuS-Hall

präsentiert. Was hän sich die paar Leid, wu zughert hän, gfrät.

Ich hab schon vor Johre mol e bissel im Stadtarchiv in Frankedahl gschdeebert un in alde Zeidunge rumgsucht, wass ich iwwer die Flomerschummer Kerwe finn:

In re Veröffentlichung vum 22. Augusd 1968 hot gstanne (un dess jetzt in hochdeitsch): "Anlässlich der Flomersheimer Vorort-Kirchweih hält der Turn- und Sportverein Veranstaltungen ab. Am Samstag und Sonntag findet in der Turnhalle der Kerwetanz statt, bei dem die Kapelle "Berges" spielt. Die Mitglieder des Clubs der Alten im TuS treffen sich am Samstag bereits um 19 Uhr im Geschäftszimmer der Turnhalle zur Ehrung eines ihrer Clubangehörigen. Am Sonntag wird erstmals die Kerwe an der bürgermeisteramtlichen Geschäftsstelle abgeholt. Der Eppsteiner Spielmannszug marschiert um 14 Uhr ab der Isenachbrücke durch die Jahn-, Haardt- und Eppsteiner Straße zur Geschäftsstelle. Von dort wird der Kerwestrauß zur Turnhalle gebracht. Die "Kerweredd", vom Präsidenten der "Flomerschummer Zwiwwelböck" verfaßt, wird von einem aktiven Fußballer vorgetragen".

1969 wars, do ist die Kerwe vum Falderblatz an die Haardtstroß verlegt worre. Un de OB Kahlberg hot domols de örtliche Vereinischunge zum Mut graduliert, dass dere Kerwe widder neie Impulse gewwe worre sin un dass die ald dörflisch Tradition dodemit nei belebt worre wär. Un die Hans Cloos, de Zwiwwelböck-Vorsitzende, hot die Kerweredd unner dem Kerwestrauß an de Turnhalle ghalde.

Un am 26. Augusd 1978 war folgendes in de Zeidung zu lese:
"Anlässlich der Kerwe stellen die "Flomerschummer Zwiwwelböck" erstmals am Bahnhofsvorplatz einen Bier-, Wein- und Grillstand auf."
Un am 29. Augusd 1978 war zu lese: "Unter dem Motto "Preise wie vor 50 Jahren" klingt heute bei den "Flomerschummer Zwiwwelböck" die Kerwe aus.

Ja, die Zwiwwelböck, die tauchen beim Feire an Kerwe und mit gute Ideje immer widder in meine "Annale" uff. In demm besagte Johr, 1978, war denne ehrn Präsident de Kurt Koch und dort am Bahnhof hän se schon die erschd Musikunnerhaltung middem Rainer Hannemann ogebode.

Un dann is immer e bissel mä organisiert worre an Kerwe.
1980 war's, als uff Aregung vun de Stadt (die wollden schnellere Vororde hawwe) die "Arbeitsgemeinschaft Dorfverschönerung" (heit häßt dess Ganze AGF, also Arbeitsgemeinschaft Flomersheim) vum Ortsvorsteher Friedel Mayer gegrind worre is, hott merr in demm Kreis a des Programm vun de Kerwe näher begutacht. Un widder warens die "Zwiwwelböck", die sich bereit erklärt hän un 1981 uff dem Platz an de Haardtstroß de erschde Feschdwerrd imme größere

Zelt waren.

Un am 29. Augusd 1983 is in de Zeitung bekannt gewwe worre: "Ein Freudentag für die Flomersheimer Bevölkerung. Rechtzeitig zum Beginn der Vorortkerwe gingen gleich zwei langgehegte Wünsche in Erfüllung: der Ausbau des neuen Festplatzes in der Haardtstraße und die Sanierung des Sportplatzes".

Bei dere domolische Oiweiung hots jo wirklichsch en größere Feschdzug gewwe, vornedro hän zwe Kerwebuwe e bändergschmicktes Bämche getrage und de Eppstäner Spielmannszug hot geblose un gedrummelt. Do hots a schun e Miß Strohhut gewwe, die hot Rita Galante ghäbe un is zusamme mit em OB Kahlberg, Ortsvorsteher Siegfried Mayer und de Vorortparlamentarier mitgeloffe. Un große Gruppe vum Gsangverein "Bund Freundschaft" und vun de "Zwiwwelböck" waren a debei. Ja un seitdem is de Feschdblitz de Kerweblitz.

Un heit sieht die Flomerschummer Kerwe doch e bissel annersd aus. Gfeiert werd oft schun ab Freitagsowens bis Dienschdagsowens. Fahne kummen raus in de Flomerschummer Straße, e dolles Bild is des in Flomerschum, ich behaupt, so schä wie in kem Vorort, weil unser Fahn halt a so schä leichde dud. E besonderes Esse extra ferr die Kerwe, ich glaab, des gibts in kener Familie mä. Gesse werds ganze Johr gut, do braucht merr net die Kerwe. Die gude Hefekuche hän Blatz gemacht fer die foine, hohe Torde mit viel Sahne un Budderkrem, die wern vun gude Hausfraue gebacke, em Feschdwerd gschdift un verdrickt im Zelt-Café am Kerwemondag.

Iwwrischens: Dess kleene Zelt hot me zimmlisch große Blatz gemacht, wu rund 350 Leit noibassen und uff pälzisch gsaat Asch an Asch hocken. Unner denne gehd die Poschd ab. An alle Kerwedage gibts Leifmusik. Ganz bekannt mit ehre Musik waren in de letschde Johre de Rainer Hannemann un de uvergesene, inzwische leider verstowene Walter Wirth als Rhoihesse-Pfalz-Duo. Wer denkt net an em Walter soi Lied vum "Scheene Karl vun Frankedahl". De Rainer spielt jetzt allä, macht so kloori Stimmungsmusik, dass die ganz Zeltbesetzung uff Bänk un Disch rumhippt, dodezu gibt's vum Rainer dolle Kerweredde als Kerweborsch un neuebei ist dess Allraundtalent noch AGF-Vorsitzender.

Kerwedanz gibts a nimmi, die junge Männer vun heit tanzen liewer in de Disco odder allä uff Disch un Bänk im Kerwezelt. De Umzug mit bunde Wägge, dess is e scheenes Iwwerbleibsel und wie gsaat die Kerweredd. Un ferr die Kinner is a immer noch was do. De Gutselstand mit foinere Sache wie frieher, Reitschul odder Schiffschaukel sin zu finne newer so moderne Fahrgschäfte wie Autoskooder.

Un viel Gäscht hänn se die Flomerschummer. Weil hier so e dolli Stimmung is im Feschdzelt kummen se so gärn zu uns. Un die Jugend is widder mä un mä

verdrede. Un dessjohr waren se ganz, ganz ostännisch, äfach goldische junge Leid, wu nix wollten, wie mitfeire. Kaode, wu wie in de Johre vorher schun mol ausgeraschd sin un viel Ärger un Glasscherwe gemacht hän, sin Gott sei Dank gar net ufgetauchd.

Wie hot e Fraa vun Frankedahl am Dienschdag nooch de Kewebeerdischung bei doller Stimmung im Feschzelt zu meer gsaat: "Also die Flomersheimer Kerwe ist große Klasse. Wir kommen immer". Rechd hot se un hoffendlich noch viel lange Johr, a wann des ferr die Kerweausrischder im Feschzelt jo en gewaldische Kraftakt mit re riese Organisation un viel Ärwet is. Reschbekt vor denne Vereine. Gut, dasses immer noch Helfer aus annre Vereine un Privatleit gibt, wu e paar Stunne Dienschd machen a vor denne det ich de Hut ziehe, wonn ich äner uffem Kopp hett.

Aller dann, fräje merr uns uff die Kerwe 2005 !!!

..unn jetzt noch wass historisches vunn de Kerwe Anno 1900:

Übermütige Kerwestreiche mit unliebsamen Folgen:

Dass Übermut nur selten gut tut, musste ein Eppsteiner Dienstknecht vor 100 Jahren am eigenen Leib verspüren. Für ihn endete ein Abstecher auf der Flomersheimer Kerwe im Krankenhaus, wo ein Oberschenkelbruch diagnostiziert wurde. Die schwere Verletzung hatte er - wie die "Frankenthjaler Zeitung" vor 100 Jahren berichtete, selbst verschuldet, "weil er während des Schaukelns in der auf dem Kerweplatz aufgestellten Schiffschaukel allerhand übermütige Streiche verübte".

Ursel Lutz

Awwer jetzt zurick zu de Kerwe 2004 unn de Kerweredd vumm Kerweborsch - unserm AGF-Vorsitzende Rainer Hannemann

Und wieder mal ist es so weit, in Flomersheim ist Kerwezeit, es freut mich immer - jedes Jahr, es sind alte und auch junge da, sitzen gemeinsam hier im Zelt, vom Tennisclub heut aufgestellt.

bigBorsch

Ich seh unser ältestes Ehepaar, de Fritz Strassner unn sei Fraa, frisch vermählt sitzt nebendran, unser jüngster Ehemann, Ronald-Martin Wilkins aus den USA und es Lauers Isabell- sei Fraa. You have hier e very nice day, bei uns in Flomerschumm iss schee.

Ich seh Vertreter von der Stadt, die Beamte sind dort Samstags knapp, einen begrüß' ich, den jeder kennt, Günther Letsch, den Sozialdezernent.

Ich seh auch Miß Strohhut unter mir, liebe Anette willkommen hier.

Beim Ortsvorsteher wußt ich net, bleibt er oder bleibt er net,
doch immer noch Chef in unserm Ort, ich begrüß de Dietmar Borth.
Und auch seine Stellvertreterin - vom Beils Kurt Hofe draus,
ich grüße hier die Marianne Nickolaus.

Von iwwer de Brick, von Eppstää driwwe,
läßt sich de neue Kerweborsch hier blicke, Markus Ziehl,
laufe nicht in die Ferne, heut Mittag kannschte etwas lerne!

Jetzt grüß ich noch den Rest der Welt, im Flomerschummer Kerwezelt.
Besonders die Fraue, des müsst ihr wisse, tu ich jetzt von hier aus Küsse
Bei de Männer loß ich es sein, denen schenke ich nachher Freibier ein.
Die PISA-Studie hat's gezeigt, Deutsche denken nicht sehr weit,
international nur noch zweite Klasse, nix im Kopp- nix in de Kasse.
Einst das Land der Dichter und Denker, wird an Bildung immer kränker,
man kann nicht mehr rechnen, kann nicht mehr zählen,
muss sich in der Schule mit anderen Dingen quälen,
die im Leben keiner braucht, doch Hauptsache - der Schornstein raucht.

Ich dachte immer, so mein Splien, die Nichtzähler sitzen in Berlin,
das war falsch, so denk ich als, mein Gott - die gibt's aach in de Pfalz.
Die Gewissheit wurde dann zur Qual, mein Gott, die sind in Frankenthal.
Und jetzt noch- um genau zu sein, die waren sonntags in Flomersheim.
Und sie alle wissen hier im Haus, er zog die Marianne Nickolaus,
- doch damit war es noch nicht aus.

Wahlzettel, für ungültig erklärt, sind dann meistens auch verkehrt,
ist einer gültig oder nicht, mir geht's wie euch, ich weiß es nicht.
So musste, für eine Entscheidung dann, die Bezirksregierung ran.
Mittlerweile hörte man von dort, Ortsvorsteher ist de Borth.

Was mich persönlich etwas kränkt, ist wie man über uns jetzt denkt.
In der Rheinpfalz konnt man lese, Blamage in Flomersheim gewese.
Ein Vergleich mit Florida, las man ebenfalls noch da,
dort wurde auch so lang gezählt, bis der Bush dann war gewählt.

Und ein Eppsteiner tut mir erzähle,
ihr Flomerschummer könnt uff 3 net zähle,
obwohl er recht hatte, des iss klar,
doch am liebschte hätt ich ihm eine neigeschlah.

Landesweit man uns jetzt kennt, Rechenschieber uns schon schenkt
und eine Stimmzählmaschin',
unterscheidet automatisch rot,schwarz,grün,
hat man uns schon angedichtet, doch wir haben drauf verzichtet.
Die war nämlich mit eingebauten Stimmenvorteil für die Rote,
die hatte de Kurt Beck uns angebote.
Des Ding funktioniert, hot der mir geschriwwe,
frag mal den Karl Ober in Studernheim driwwe.

Die Maschin' vunn den Schwarze konnte mir auch net nemme,
die soll vollautomatisch die rote Zettel verbrenne.
Doch das Ding funktioniert nicht, das war mir klar,
als ich das Ergebnis in Studernheim sah.

Alternativ vunn de Grüne dann,
eine Stimmzählmaschin mit Windrad dran,
zum Steuern hat man dort ein Ruder, Erfinder ist der Gerhard Bruder,
die aber dann nur richtig geht, wenn Pfälzer Wind im Vorort weht.

Doch positives kann man auch noch sehn,
wo ist es bisher schon geschehn,
das man bei einer Wahl bei patt zwei gleichbeliebte Kandidaten hat.
Wer da drüber mal nachgedacht, hätt' nicht so über uns gelacht.

Doch lassen wir das Thema sein und steigen in die Kerwe ein.
Vier Tage lang und auch die Nächte, hat man in Flomersheim viel Gäste,
sie lachen,trinken,tanzen,schunkeln,
man sieht sie Essen oder munkeln,
man sieht sie nüchtern und mit Gas, egal
Hauptsach es macht Spaß.

Doch Halt, bevor ich jetzt geh, zeig ich euch noch die AGF-CD,
eindrucksvoll - mit vielen alten Bildern,
besser kann man Flomersheim nicht schildern,
nur 10.-Euro koscht der Spass und gibt's üwwer die Kerwe an de Kass.

Unn nooch de Kerwe gibt's die dann, bei Müller, Rupp und Hannemann.
So, langsam mach ich mich jetzt naus,
grüß nochmal Borth und Nickolaus,
denn ohne die beiden, dess müsst ihr wisse,
hätte die Kerweredd mangels Stoff ausfalle müsse.

Tschüss, macht's gut unn feiert schee, es grüßt euch de Rainer vunn de AG

**... unn jetzt kummt de dridde Dääl vunn unsere große
Kerwe-Trilogie, nämlich die Kerwebeerdigung 2004
....ferr die Noochwelt feschtghalde vunn de Ursel Lutz**

Wie ich de Dokder Henning Vogel vum Tennisclub vor de Kerwe dessjohr gfrogt hab, ob a e Beerdigung gemacht werd, do hotter gsaat "wahrscheinlich nicht". De Dokder Vogel is nämlich ken Pälzer, awwer verstehe duder uns immer.

Do hab ich em kä Ruh gelosst. Wann die Kerwe net beerdigt werd, ja dann kann so jo a net ufferstehe, hab ich gedenkt un hab en äfach immer widder iwwer die Kerwedaage ogebabbelt.

Am Diensdtagowend ziehder dann im Kerwezelt en Zeddel aus de Hossedasch un jubelt ganz zufriede "gestern Mittag ist mir plötzlich was eingefallen" un soi Aage hän gschdrahlt. "Ei dess is jo prima" hab ich gsaat un mich schun uff die Beerdigung gfreet (im normale Lewe gibt's jo hegschdens Dräne bei re Beerdigung), awwer die Kerwebeerdigung dreiwenn ehm Freudeträne in die Aage.

Ja un warum war ich so wild uff e Kerwebeerdigung? Ich hab im Hinnerkopp ghat, dass genau der Dokder Henning Vogel 2001, wu de TCF a Kerweausrischer war, durch e orginelli Seebestattung die Kerwe in de Isenach versenkt hot (dess war naderlich e Flasch mit Alkohol, wege de Feierstimmung). Un 2002 hot dann de Erwin Hiller als damalischer Vorsitzender vun de Zwiwwelböck im Triewe vun de Isenach gfischt, die Flasch gfunne un se bei de Kerweöffnung bräsendiert. Die Narre waren do nämlich Feschdwerd.

Ja, un do fällt merr noch 1998 oi, wu de TCF a Kerweausrischer war. Ei do hot de Henning Vogel a so en dolle Oifall ferr die Beerdigung vun de Kerwe ghat. Do hotter newer so me Drauerzug mit groinende Fraue siwwe Männer (zwee Sargträger und fünf annere in schwarze Zillinder uffem Kopp) debai ghat. Die fünfe hän an ehre seidene Hut die fünf große Buschdawe K - E - R - W - E präsendiert und genau die sin donn imme weiße Sarg beerdigt worre: Dess K hott laut demm Henning de Kerweshoppe soi solle, dess E wars Esse, dess R is begrawe worre ferr de Ramba-Zamba an Kerwe, dess W hott gstanne ferr Weißherbscht un Wellfleisch, dess letschde E vum Word KERWE ist begrawe worre als "Einmalisches Ereignis - Flomerschummer Kerwe". Zu denne zur Ruh gelegde Buschdawe is noch e Flasch Pälzer Riesling-Woi kumme un wie kanns bei me Tennisclub onnerschd soi: a noch roode Sand vun de Tennisblätz drauß am Bahnhof. Der, so hott damals de Henning gsaat, hott die Kerwe schütze un kühl un drocke halde solle. Un weil widder die Zwiwwelböck e Johr druff die Kerwe ghat hän, hot de Henning a noch e Flomerschummer Zwiwwel dezugelegt, damit sich die KERWE an Geruch un

Gschmack vun dem köschdlische Flomerschummer Gewächs gewehne gekennt hot.

Un do hab ich merr gedenkt, wonn äner so gude Oifäll ferr e Kerwebeerdischung schun ghat hot, dann kanner doch net kneife und 2004 die Kerwe grad so am Dienschdagowend im Zelt hocke losse. Isch glaab, do hab ich rechd ghat.

Ich hab merr noch dere Beerdischung em Henning soi Redd (ach, was hodder di schä gsunge - Sprachsang nennt merr sowas glawisch) unner de Naggel gerisse, wann ehr die lese dut, do wisst ehr genau, dass dess widder en doller Oifall war. Unser Flomerschummer Kerwe ruht jetzt als Weck, Worschd un Woi in de Kiehldruh zwische eschde Eiswerfel. Iss des net doll? Un die Zwiwwelböck missen se 2005 ufftaue. Ich bin mol gschbannt, ob die Kerwe dann noch so frisch un guud is wie bei ehre Beerdischung 2004 (iwwrischens: Weck, dess waren mindeschdens zeh Stick, die Worschd des war en riesische Ring Fleeschworschd, de Woi soll en ausgesucht leckere Droppe gewesst soi).

So, jetzt kummt demm *Henning Vogel* soi Kerwebeerdigungsgrabgangsredd. Ehr misst verziehe, dass dess net ganz pälzisches Gebabbel iss, awwer wie gsaat: de Henning iss kenn Pälzer, sondern en Norddeutsche. Awwer bei denne gude Oifall issem dess verziehe:

Kerwe-Beerdischung 2004


"Nun tragen alle tiefe Trauer, uns überkommt ein Gänseschauer.
Die Kerwe soll jetzt ruh'n in Frieden, soeben ist sie hingeshieden.
Vier Tage haben wir's getrieben. Als Kerwesymbol ist geblieben,
ihr seht es hier: "Weck, Worscht un Woi", das haben wir für euch dabei.
Vier schöne Tage Freud' wir hatten, geht das Begräbnis jetzt vonstatten.
Wir müssen von der Kerwe scheiden,
ganz Flomersheim muss ein Jahr leiden.
Ein Jahr schnall'n wir den Gürtel enger, denn Totgesagte leben länger.
Es wäre dumm, daran zu denken, die Kerwe in ein Grab zu senken.
Im schwarzen Sarg, an dunkler Mauer, das wär ein Kerwetot von Dauer.
Um nie die Kerwe zu verlieren, müssen wir sie konservieren.
Die Kerwe geht so nie verloren, statt beigesezt nur eingefroren.
Damit sie richtig wohl sich fühlt, wird sie nun ein Jahr tiefgekühlt.
Bei minus zwanzig, sicherlich, bleibt Weck un Worscht besonders frisch.
De Woi kennt platze, was nit soll,

drum mache mer die Flasch nit voll.
Es ist sehr wichtig zu erwähnen, de Woi braucht Platz, sich auszudehnen.
Drum nimm die Flasch ich mit ee'm Satz,
drei Schluck fer mich - de Woi hat Platz.
Zum Schluss noch schnell de Stopper zu. De Kerwevoi legt sich zur Ruh,
wird jetzt in dieser Box verstaute und pünktlich wieder aufgetaut,
am letzten Samstag im August, 2005 mit Spaß und Lust.
Und der Gedanke stimmt uns heiter, dann geht die nächste Kerwe weiter.
Ein Kerwe-Weekend - faschingsjeck, denn Festwirt sind die Zwiwwelböck.
Das Jahr geht rum - trotz Trauerschmerzen,
die Kerwe bleibt in uns'ren Herzen.
Das wär's ihr Leut', die Red' ist aus,
ihr braucht deshalb noch nicht nach Haus.
Bleibt hocken bis nach Mitternacht und feiert, dass die Schwarte kracht.
In Flomersheim, wie es sein soll, ist auch das Zelt am Schluss noch voll.
Nach vier so schönen Kerwetagen, kann ich drum tausend Dank nur sagen.
Dank allen Helfern, Alten, Jungen, die ehrenamtlich eingesprungen.
Und euch, ihr Gäst' dank ich als Chef: "Macht's gut!" wünsch ich vom TCF.
Und allen die hierher heut kamen, künd' ich:
"Die Kerwe soll frieren, ein Jahr lang - Amen!!!"



Die Fraa "Brigiddelsche" aus Wien

e Gschichtl auserm eschte Lääwe - vumm Walter Rupp



Heit muss isch eisch mool verzehle, wie glää die Welt iss:

Vor Korzem war aus Wien vunn 're Fraa Professor Brigitte Sokop e email in unserm Combjuuder oigedrudelt, in dem se sisch ferr ehr Pfalz-Sammlung unser Elwedritsche-Lexigon beschdelle wollt. Zuerscht hämmer dann ganz brav hie- unn hergemäält - iwwer Bankdate, Versand usw. - uff hochdeitsch naddierlich - bisse dann gschriwwe hott: "Als Pälzer Grott muss isch dess Buch äfach hawwe...."

Logisch, dass merr dann noochgebohrt hänn, aus welchem Egg in de Palz dassa wohl herkommt unn wie se uff uns gschdoose iss..

"Isch bin nadierlich e eschdi Fronkedahlerin, uffgewachse in de Hildebronschdroos mit em Gaade beim Ormsheimer Hof un seid 1958 hab isch in de Karolineschuul gewohnt. Do is nämlich moin Vadder Hausmeeschder worre (Werner Nagel, aa en eschder Pälzer, bloß "Nachel" hot mer nit zu ihm saache dirfe).

Desjohr waa isch schunn zweemol in de Palz, zuledschd im Juli... un do waa isch sogar in Flomerschemm - mir ham nämlich beim Brauer in de Raiffeiseschdrooß Klassetreffe ghabt - 35 Johr Abiduur! Schunnschd wohnt aus moinere Klass nur noch die Hanno Guth bei eich, alle onnere sin - manche bloß e bissel - weider weg gezooge. Wie immer waa isch nadierlich im Museum ...un do hawwisch Eier Elwedritsche-Fossil gsehe, Eier Kärtel mitgenumme un im Indernet nochgeguggt..... so bin isch uff Eisch kumme!"

Iwwer's Internet hämmer dann rausgfunne, dass "unser" Frankedahler Brigiddelsche in Östreisch e bekannadie Persönlichkeet ist. Als Autorin, Heimatforscherin unn Historikerin hott sie sisch dort enn Name gemacht unn hott vumm österr. Bundespräsident de Berufstitel: "Professorin" verliehe griggt. Sie hott unner annerem enn mordsmäßische Wälzer - e genealogisches Nachschlagewerk - mit dem Titel: "Stammtafel europäischer Herrscherhäuser" verfasst. Naddierlich hämmer ihr dann unser "Flomerschummer Gebabbel-Hefte" zugschiggt, dass ehr Häämwee e bissel verschdärkt werrd. Dann hott se widder gschriwwe:

"Noch iss des Häämweh nit so groß, weil die halb Diefkiehlhruuh noch voll is mit Lewwerkees, Lewwerknepp, Saumaage, Nußschinge un nadierlich Lewwerworschd. Awwer wammer des uffgesse ham, wer isch als longsom zabblisch."

"Du pälzelschd widder" hot moi Männel gsaat, wie isch e paa Hefdelscher vunn dem "Flomerschummer Gebabbel" gelese unn ihm aa immer widder draus vorgelese hab. Unn dess, wo isch misch doch schunn dreidreissisch Johr bemieh, Wienerisch zu babble, was normalerweis jo gonz schää klabbt. Un jetzd bin isch widder gonz aarisch drin...."

Die Gebabbel-Hefde hab isch all geleese - jetzd gugg isch zum zwettemol des doller Elwedritsche-Lexigon durch un donn muss de Alldaag widderkumme, weil in so enere Phaas iss es donn leisched meeglich, dass isch bei uns innerem Laade "e halwes Pund weißer Kees" uffpälzisch verlang.

Bei uns dehääm is immer Mundart geredt worre. Wie isch in die Schuul kumme sollt, war do enn Dogder, der uns gebrieft hod, ob mer schunn reif dodefor sin, unn hod misch noch de Farwe gfroogt: "Rood, bloo, grien unn geel" habbisch do gsaat. Moiner Mudder war des peinlich (Dialeggd redder bloß die Dabbische). Moi Oma, eigendlich e Urpälzern, wollt awwer a, dass die Kinner ooschdännisch redder: do hot se mol gsaat "Auf dieser Uhr ist ein Zeuger dran!"

Dass die Isenach durch Flomerschumm fließt, hab isch gaanit mehr gewissd. Mer ham on de Isenach bei de alde Miehl (hinnerm Röntgeblatz, die hamse jo zudedeggeld)

immer gschbielt. Un wonn isch noch Fronkedahl kumm muss isch immer hinnerm Schdrondbad zur Isenachbrigg Rischdung Studdrem. Do hawwisch nemmlisch moindre Eldere zur Goldene Hochzisch e Beemsche kaafd un plonze losse.

Ja de "Hans-Richard" is de Reschdsowalt, neewer dem hab isch im AEG zwää Johr gehoggd. Der isse mol gfroogt worre, was 1365 bassiert is, un do hot er gsaat "do hot Flomerschumm iwwer Eppschrää 3:0 gewunne". Soin Vadder war en gonz Gloore, 1999 war er noch debei. Un die Dochder vum Zäädokder in Flomerschumm, Angelika Knoch, waa aa doo, die waa aa bis zum Schluss in moiner Klass. Un aus Lambsem die Renate Klein, die heit widder in erm Eldernhaus wohnd. An die Elke Fruth hawwisch widder gedenkt, wie isch den Name "Fruth" im "Gebabbel" gelese hab.

Alla donn, donk schää un viel Gries in die Palz vumm Brigiddelsche

PS: "Geschdern is genau des bassierd, was ich schunn middem "weiße Kees" befirscht hab: Isch hab in de Schdroosebahn zu 'me Kind gsaat: "Rutsch emol do noi, bidde".

Unn dann hott se uns die Fraa Proffesser noch e gloores Gedischtel iwwer die Dollkersch (Tollkirsche) uff pälzisch mitgschickt, ferr desse (uff wienerisch) in Öschderreisch sogar mool enn Breis griggt hott:

Die Dollkersch (*Atropa belladonna*)

Ach du wildes Hexekraut - schmiert eisch die Salb ihr uff die Haut, dann schbinnter völlisch idiodisch - so exzessiv lasziv erodisch. Esst er awwer gar die Frischd alsemol e onneri Gschischd: Immer babble, dabbisch lache un aa bleede Sache mache. Nemmschd die Wurzel in em Woi schloofscht mit doller Drääm donn oi, verwischd zuviel, hoscht Pesch gehatt, Freund Hein schdeht dann glei uff de Matt. *Atropos* - isch hab's im Gaade, dass isch's nemm, dodruff konnschd waade, weil Drooge, die sin gaanit gloor. Gift druff, do kummt doch alleweil was vor.



DE FELDSCHITZ BAUER UNN SOIN SCHDROOFVOLLZUG

vumm Dr. Bodo Schmidbauer

Bei unserm Feldschitz Bauer soim Fahrrad war dort, wu normalerweis die Luftbump hängt, soin "fürchderliche" Rohrschdock befeschtischt. Jedio Woch hott er sisch 3 bis 4 neije Schdeck schneide misse, weil meer Buwe se immer widder geklaut hänn. Unn weil der desswege kä Luftbump debei ghatt hot, hämmer ihm als ah noch ab unn zu die Luft runner gelosst.

Wie er uns mool beim "Niss schdobble" verwiwscht hot, isser uns ah widder middem Rohrschdock noogange. Der Baam war nämlisch noch garnit abgeernt. Er hot de Wolfgang - der iwwer de Bahn nääwers Weicke gewohnt hot - verwischt unn hodden iwwers Knie gelegt. Do hodden de Wolfgang agfleht: "Bidde Herr Schitz, schlaachense misch nit so fescht - isch hab nämlisch heit kä Unnerhosse a".

Bosch

BLOSS KÄ ANGSCHT HAWWE

vumm *Walter Rupp*

Schdoggdunkler Wald - raaweschwarzie Nacht!
Därre Bladder rascheln bei jedem Schritt -
unner de Fieß krachen abgeschdorwene Äscht.
E Kaitzel greischt ganz firscherlisch -
vielleischt e gehoimes Zeische vumm Feind ?
Dess schniert merr grad die Kehl zu.
Moi Herz rast wie wild,
in de Ohre heer isch´s Bluud rausche.

Gedanke schießen durch de Kopp - greiz unn quer.
Schnell nunner uff die Knie -
im Gebisch verschdeggelt - sischer iss sischer.
Jetzt bloß nit ufffalle - jo nit entdeckt wärre.

Vunn de Kammerade iss nix zu heere,
awwer sie sinn do - dess schbier isch genau.


S´iss nit´s erschde Mool,
dass merr in so´re Siduazion sinn -
uff so´re schwierische Mission.
E handvoll furschtlose Schbezialischde -
allä gäge die ganz Welt.

So mancher iss schunn uff de Schdreck gebliwwe,
awwer´s hilft nix - do miss´merr jetzt dursch -
do gibt´s kä Zurigg - zusamme simmer schdark.

Enn grelle Lischtschdrahl beitscht durch die Nacht -
de Truppfiehrer greischt: **“Attacke” !!!**
Alle Kamerade blären wild durchenanner,
globben wie verriggt uff die Hecke -
rennen schoinbar ziellos in die Nacht.
Ich will ah greische, laut unn befreiend -
awwer isch grieh känn ähznische Ton raus.


Mit ähm Schlaag iss alles widder ruisch -
muggs-maisel-schdill.
Moi Herz raast noch wilder - moi Schlääfe globben.
Bletzlisich ruft Ähner:
“Widder nix - merr gehen hääm!”

Schaad ferr die ganz Uffregung - denk isch ferr misch.
Awwer gloor isse doch immer widder -
so e Elwedritsche-Jacht.



De Gääsbock als Alkohol-Opfer

vunn Dr. Bodo Schmidbauer



In de Kriegs- unnd Noochkriegszeit hott's noch ferr Flomerschumm unnd Ebbschdää e "Besamungsanstalt" gewwe. Dess waren enn Fassel (= Schdier bzw. Bulle), enn Äwwer unnd enn Gääsbock - de "Fritz".

Ferr uns Buwe war's immer e besonderes Ereignis, wann e Kuh zum Fassel odder e Sau zum Äwwer odder e Gääs zum Bock gfiehrt worre iss. Gern gsehene Zuschauer am Hofdoorschlitz odder an de Mauer waren mer Buwe jo net unnd merr hott immer versucht uns zu verdreiwe.

Amme schääne Daag, wie meer Knilche grad vunn de Kunnferrmannndeschdunn aus'm Parrhaus in Ebbschdää häämngeloffe sinn, hott grad mool widder die alt Fraa Singer ehr Gääs zum degge gebrocht. Meer hänn dess schunn an de Isenachbrigg schbitzgriecht unnd uns sofort uff die Lauer gelegt. Eigendlich wollde merr jo an demm Daag wass ganz Anneres mache unnd hänn dodefor aus de Braxis vunn moim Vadder e klä Fläschel 96%ische Alkohol unnd aus de Kisch e paar Schdiggelscherr Werferzugger "abgezwaagt". Dess iss uns jetzt grad rescht kumme.

Domools in denne schlechte Zeide hänn alle "Besamunge" (bloß die vunn de Diere - Anm. d. Red.) wege de Flääschbewertschafdung in Formulare feschtghalde werre misse ... unnd dess hott gedauert unnd gedauert. In de Zwischezeit hänn meer hinner de Mauer ghoggt unnd der Gääsbock hott dauernd de Kopp durch e Mauerloch zu uns rausgschdreggt - nit uhne Grund - meer hännen nämlisch ordentlich mit alkoholgetränkte Zuggerschdiggelscher verwähnt.


Wie dann e verrdl Schdunn schbeeder de Knescht die Schdalldeer uffgemacht hot, iss de Fritz dodaal luschtlos unnd iwwerzwersch dort stehe gebliwwe. Sunscht iss der als sofort schdolz unnd dabber rausgewetzt - awwer heit ... Selbscht wie'sen dann uff die Gääs owwedruff gehoggt hänn, hott er sein Liewesdienschtt verweigert.

Dodemit weer die Gschicht eigentlich schunn zu Enn, awwer sie geht noch weider:

E paar Woche schbeeder hänn die Besitzer vunn dere Gääs e Wutzel gschlacht unnd hänn uns e Kann voll Worschdsupp unnd e klä Griewe- unnd e Lääwewärschdel riwwer gschiggt. Als besonderie Delikadess war noch e Päärle Bockwärscht debei. *"Die missense noch 2-3 Woche an de Luft driggle losse"*, hämmer gsaat griggt. *"Herr Dogder, beinoh hett'merr Sie die Woch was gfroogt - obwohl Sie jo enn Menschedogder sinn unnd känn Viehdogder - wass merr hedden mache solle, weil unsern Fritz vunn ähm Daag zum annere impodent worre iss - mehr hänn denn Bock halt schlachte misse"*. Isch hab en feierroode Kopp griggt unnd bin dabber aus de Kisch naus gschliche. Der Fritz hot merr jo arg lääd gedah - awwer ganz ehrlich: Die Bockwärscht hänn uns klasse gschmeggt.

Bosch

GEBABEL-RÄDSEL NR. 14:

Seit 2004 sinn in Flomerschumm 9 historische Schilder zu sehe, die an alde Bauwerke odder Gewerbebetriebe in unserm Ort erinnern. 

Unser Rädsel froog iss dessmool, wass ferr Schilder dess wohl sinn. Wie gsaat, es sinn 9 Schdick unn die sollen Sie unner 15 Möglischkeide rausfinne (dess weer doch jetzt mool e Gelegenheit, enn gemiedliche Schbaziergang durch Flomerschemm zu mache !!!).

Wann merr die Buchschdaawe vor denne 9 rischdische Beschreiwunge runnerliest, ergibt sich unser neijes Leesungswort:



- W** Bahnhofsgebäude
- I** Ortsverwaltung, Freinsheimer Str. 15
- A** Schreinerei Kozma, Freinsheimer Str. 114
- P** Polizei + Gefängnis, Parkplatz neben "Bürgerstübchen"
- E** Kriegerdenkmal, vor der Ortsverwaltung
- P** Ehemalige Schule, Parkplatz neben "Bürgerstübchen"
- E** Gerichtstätte, Falterplatz
- L** Friedhof
- N** Schneiderei Rupp, Freinsheimer Str. 107
- A** Evangelische Kirche, Marin-Luther-Straße
- S** Feuerwehrgerätehaus, Phillip-Best-Str. 21
- T** Schreinerei Schwindt, Falterstraße 17
- E** Ehemalige Maschinenfabrik Koch, Im Kleinfeld
- O** Straßenwaage, Haardtstraße (Edeka)
- R** Zehntscheune, Falterplatz 17

--	--	--	--	--	--	--	--	--

Dess Leesungswort uffen Zettel unn bis zum 30. Januar 2005 in de Keramikwerkschdatt Rupp, Frännsemer Schdrooß 107 oischmeiße.

Zu gewinne gibt's dessmool e tollie Kaffeemaschien(*),
3 Flasche Elwedritschewoi unn 2 große Müüslitasse(*).

(*) = Spende vumm Edeka-Aktiv-Markt/Fam. Scholz

Es iss wu annerschd nit schänner wie inn de Palz

Vorne de Rhoi unn hinne die Berge. Ab unn zu muss isch an de Rhoi, do wu friher de Effler waf, gugg e bissel de Schiffe zu. Mansche liggen ganz dief unn schwer im Wasser unn die Annere, menschd grad, die fliegen iwver die Wasserowerfläsch. Uff dem Wegel am Ufer entlang, Rischdung Worms bis an die Audobahnbrigg, begegnen ehm vie Zeidgenosse. Die äne häns Enkelsche debei unn die annere de Hund. Die Äldere vun denne Schbaziergänger kennt mer vum Sehe, die aus Frankedaal unn Umgebung kummen. Die grieben unn bieten e "Gunn Dach". Fremde unn Junge kennen des gar nimmi.



E annermol fahre mer Rischdung Laudre - Bermersenz. Dess is ab Derkem e wohltuende Geschend, so rischdisch zum Erhole. Die Leid do hinne sin freudlich, gewwen ehm Auskunft, wann

de was suchschd helfense unn babblen als werschd aus de Nochberschaft. Des finn isch soo toll. Oft denk isch so fer misch, do fahrt mer alle Johr in die Östreischer Alwe. Isch glaab wann vun dort die Leid unser schääni Palz mol sehe kennten, deden die beschdimmt uns froche, ob mer noch ganz dischd sin. Mer will halt a mol naus, was anneres sehe, mer sagt: e anneri Dabbeet.

Christl Müller



DREHER PRINTMEDIEN GmbH

Hannongstr. 27

67227 Frankenthal

Tel. 06233 27242 - Fax 27552

Grafik, Satz, Druck, Papier und Bürobedarf

Imbressum: Idee/Gschdaldung/Rädsel: Walter Rupp

Redagzion: AGF-Arweitskreis "Flomerschummer Gebabbel"

Druck: Dreher Printmedien GmbH, Frankenthal - Ufflag: 1500 St.

Beidräg bidde an Rupp, Fränsemer Str. 107, Flomerschumm

Drucxksfehler sinn beabsichdischt unn zur Unnerhaldung oigebaut

Dezember 2004

Liebe Leser und Liebhaber des “Flomerschummer Gebammel”

Unser beliebtes Gebammel-Heftchen mit Flomersheimer Berichten und Anekdoten in Pfälzer Mundart ist mittlerweile in unserem Vorort schon zum Kult geworden.

Seit 1995 haben wir es 14 mal kostenlos an jeden Haushalt verteilt und es hat in all den Jahren im näheren und weiteren Umkreis viele Freunde gefunden.

Aus Kostengründen können wir allerdings zukünftig nur noch diejenigen Leser berücksichtigen, die wirkliches Interesse an dieser Lektüre haben. Wir sind gerne bereit, Ihnen weiterhin ein Exemplar zukommen zu lassen, wenn Sie uns nachstehend Ihr Interesse daran mitteilen und den Abschnitt (oder einen anderen Zettel) bei der Keramik-Werkstatt Rupp, Freinsheimer Straße 107 abgeben oder dort in den Briefkasten werfen.

“Flomerschummer Gebammel”

Vorname/Name: _____
Straße: _____
Plz/Ort: _____
Telefon: _____

Die nächste Ausgabe bekommen Sie dann sofort nach Erscheinen kostenlos an Ihre vorstehende Adresse zugestellt.

Für eine freiwillige Spende zur Deckung der inzwischen nicht unerheblichen Druckkosten wären wir Ihnen natürlich sehr dankbar.

(AGF - Stadtparkasse - BLZ 545 510 30 - Konto 30106)

.....
Wir bedanken uns für bisherige Spenden bei: Frau Wilma Eberle, Flomersheim - Fam. Iris Adam, Kirchheimbolanden - Fam. Dietmar Franz, Hanhofen - Frau Hanna Mirtschin, Frankenthal - Frau Rosa Peter, Eppstein - Frau Marianne Schwarz, Flomersheim - Frau Helene Hartmann, Villingen-Schwenningen - Fam. Klaus Scholz, Beindersheim - Fam. Detlef Achtzehn, Frankenthal - Fam. Dr. Bodo Schmidbauer, Schwetzingen - Edeka-Aktivmarkt, Flomersheim

Die Vorstandschaft der Arbeitsgemeinschaft Flomersheim:

Rainer Hannemann, Leiniger Str. 12, Eppstein,
Christl und Rolf Müller, Händelstr. 3, Eppstein
Ursula Lutz, Freinsheimer Str. 104, Flomersheim